


初 中 學 生 文 庫

註 釋 分 級 古 文 讀 本

甲 編 二

編 者 呂 珮 芬 註 釋 者 劉 傳 厚



中 華 書 局 編 印

註釋分級古文讀本 甲編二

范仲淹苦學濟世 宋名臣言行錄

范仲淹〔一〕二歲而孤，母貧無依，再適長山朱氏。既長，知其世家，〔二〕感泣辭母，去之南都。入學舍，晝夜苦學，五年未嘗解衣就寢；〔三〕夜或昏怠，輒以水沃〔四〕面。往往饘粥〔五〕不充，日昃始食。遂大通六經〔七〕之旨，慨然有志於天下，常自誦〔八〕曰：『士當先天下之憂而憂，後天下之樂而樂也。』

〔一〕范仲淹，字希文，宋吳縣人，有文武才，爲朝廷所倚重。宋仁宗時參知政事。

〔二〕「知其世家」，謂知己非朱氏子也。

〔三〕「未嘗解衣就寢」，謂連衣而臥。

〔四〕沃，澆也。

〔五〕饘，音廛。厚粥。叫饘，稀粥。叫粥。

〔六〕日昃，謂時已過午。

〔七〕六經，即詩、書、易、禮、樂、春秋；今無樂經。

〔八〕自誦，謂自言。

馬仲棄官求學宋史

崇寧〔一〕初，范致虛〔二〕攻程頤〔三〕爲邪說，下河南府，盡逐學徒。馬仲〔四〕時爲西京法曹〔五〕，求依頤門以學。頤固辭之，仲欲休官而來。頤曰：『時論方異，〔六〕恐貽子累。』仲曰：『使得聞道，死何憾？況未必死乎？』頤歎其有志，進之。自是公暇，雖風雨，必日一造。忌者飛語中傷之，弗顧，卒受中庸〔七〕以歸。

〔一〕崇寧，宋徽宗年號。

〔二〕范致虛，字謙叔，宋建陽人。

〔三〕程頤，字正叔，宋洛陽人。爲學以誠爲本，以窮

理盡性爲宗，時稱伊川先生。

〔四〕馬仲，字時中，宋東平人，紹聖進士。

〔五〕法曹，官名，卽司法官參軍事，掌鞠獄者。

〔六〕謂致虛等之攻擊。

〔七〕中庸，孔伋所述，本爲禮記中的一篇，宋儒特提出，作爲四子書之一。

桑維翰不從他仕五代史

桑維翰〔一〕爲人醜怪，身短而面長。常臨鑑自奇，曰：『七尺之身，不如一尺之面。』慨然有志於公輔。〔二〕初舉進士，主司〔三〕惡其姓以爲「桑」，「喪」同音。人有勸其從他求仕〔四〕者，維翰乃著日出扶桑〔五〕賦以見志。又鑄鐵硯以示人曰：『硯弊〔六〕則改而他仕。』卒以進士及第，〔七〕拜中書令，〔八〕封魏國公。

〔一〕桑維翰，字國僑，五代河南人。

〔二〕公輔，公爲三公，輔爲輔相。意欲身爲宰相，佐

君王治國。

〔三〕主司，卽考試官。

〔四〕謂從他途求仕。

〔五〕扶桑，神木，古謂爲日出處。

〔六〕硯弊，謂硯穿也。

〔七〕唐制，應考者謂之舉進士，試畢放榜及格者，

謂之進士及第。

〔八〕中書令，官名，中書省之長官。

王濬起宅見志晉書

王濬〔一〕恢廓有大志，嘗起宅，開門前路，廣數十步。或謂之太過。濬曰：『吾欲使客長戟幡旗。』衆咸笑之。濬曰：『陳勝〔二〕有言：「燕雀安知鴻鵠之志哉！」』嘗參羊祜征南〔三〕軍事。祜兄子白其爲人志大，奢侈不節，不可專任。祜曰：『濬有大才，將欲濟其所欲，必可用也。』後果以平吳〔四〕功，封襄陽侯。

〔一〕王濬，晉弘農人，爲羊祜參軍。

〔二〕陳勝，字涉，秦陽城人。嘗輟耕田畔，謂人曰：『

苟富貴，無相忘。』衆笑之。勝曰：『燕雀安知

鴻鵠之志哉？』

〔三〕征南，謂伐東吳也。

〔四〕濬伐吳之役，治戰艦，發成都，吳人置鐵鎖於江以橫截之，濬燒斷鐵鎖，直抵石頭城下，孫皓迎降。

管寧割席分坐世說新語

管寧〔一〕華歆〔二〕共園中鋤菜，見地有片金，管揮鋤與瓦石不異，華捉〔三〕而擲去之。又嘗同席讀書，有乘軒車過門者，寧讀如故，歆廢書出看〔四〕。寧曰：『富貴須自致，窺他人乎？』遂割席分坐，曰：『子非吾友也。』及歆爲司徒，上書讓寧，寧聞之，笑曰：『子魚本欲作老吏，故榮之耳。』

〔一〕管寧，三國魏朱虛人，漢末避亂居遼東三十

七年始歸。文帝拜爲大中大夫，明帝拜爲光祿勳，皆辭不就。

〔二〕華歆，字子魚，東漢高堂人。仕漢至尙書令，仕魏至太尉。

〔三〕捉，拾也。旣拾而擲去，終不免爲財心動。

〔四〕廢書出看，謂拋開書卷外出觀看也。

陳蕃掃除天下後漢書

陳蕃〔二〕年十五，嘗閒處一室，而庭宇蕪穢。父友薛勤〔三〕來候之，謂蕃曰：『孺子，何不灑掃以待賓客？』蕃曰：『大丈夫處世，當掃除天下，〔三〕安事一室乎？』勤知其有清世志，甚奇之。〔四〕及靈帝卽位，竇太后臨朝，委用於蕃。蕃疾中常侍〔五〕曹節〔六〕等並亂天下，上疏請誅之。太后不納，遂爲節等所害。

〔一〕陳蕃，字仲舉，東漢汝南人。

〔二〕薛勤，漢汝南人。

〔三〕「掃除天下」，掃除國內禍亂以求治平。

〔四〕奇其年幼而有志。

〔五〕中常侍，秦置；後漢改用宦官充之。

〔六〕靈帝時，宦官曹節、王甫等橫行無忌，蕃與大將軍竇武密謀誅之。事泄，爲節等所害。

馬援馬革裹尸後漢書

馬援〔一〕少有大志，嘗曰：『丈夫爲志，窮當益堅，老當益壯。』後爲伏波將軍，擊交趾有功，封新息侯。援謂故人孟冀曰：『我以微勞，猥饗大縣功，薄賞厚，何以能久？方今匈奴、烏桓〔二〕尙擾北邊，欲自請擊之。男兒要當死於邊野，以馬革裹尸〔三〕還葬耳，何能臥牀上，在兒女子手中耶？』

〔一〕馬援，字文淵，東漢茂陵人。初仕隗囂，後歸光武。

〔二〕匈奴，北狄之一族；烏桓，東胡之別種。漢初匈奴滅其國，餘類保有烏桓山，因以爲號。後漸繁盛，屢侵漢邊。

〔三〕先是馬援征交趾，立銅柱以表功。及武陵五溪蠻反，援復將兵討之，時年已八十餘。嘗謂『男兒當死於邊野，以馬革裹尸。』後果卒於軍。

終軍入關棄繻漢書

終軍〔一〕少好學，能屬文；年十八，選爲博士弟子，〔二〕至府受遣。太守召見軍，甚奇之，與交結。軍揖太守而去。步入關，關吏予軍繻，〔三〕軍問何爲？吏曰：『爲復傳還，當以合符。』軍曰：『大丈夫西遊，終不復傳還。』棄繻而去。後爲謁者，〔四〕使行郡國，建節東出關。關吏識之，曰：『此使者乃前棄繻生也。』

〔一〕終軍，漢濟南人，字子雲，博辯能文。武帝時爲博士，累擢諫議大夫。自詣闕願受長纓，繫南越王。死時年二十餘。

〔二〕漢武帝設博士官，置弟子五十人，令郡國舉送。唐以後亦稱生員爲博士弟子。

〔三〕繻，以帛製之符信也。

〔四〕謁者，官名，漢置，掌賓讚。

許衡不妄取物〔元史〕

許衡〔三〕言動必揆〔三〕諸義而後發。嘗暑中過河陽，〔四〕喝〔五〕甚，道有梨，衆爭取啖之。衡獨危坐樹下自若。或問之，曰：『非其有而取之，不可也。』人曰：『世亂，此無主。』曰：『梨無主，吾心獨無主乎？』凡人有所遺，一毫不義，弗受也。齋居有果，熟爛墮地，童子過之，亦不睨視而去。其家人化之如此。

〔一〕元史，明宋濂等撰。

〔二〕許衡，字平仲，元河內人。好學，得程朱書，慨然以道自任。學者稱魯齋先生。

〔三〕揆，度也。

〔四〕河陽，元之縣名，今河南孟縣有河陽故城。

〔五〕喝，音曷；暑，天中熱也。

呂希哲不欺闇室宋名臣言行錄

呂希哲^{〔一〕}正獻公之長子。正獻雖甚愛公，然教公事事循蹈規矩。甫十歲，行步出入，無得入茶肆、酒肆、市井里巷之語，鄭衛之音^{〔二〕}未嘗一經於耳；不正之書，非禮之色，未嘗一接於目。及長，專慕曾子^{〔三〕}之學，盡力乎其內，^{〔四〕}不尚虛言，不爲異行。^{〔五〕}正獻嘗語張耒曰：『此子不欺闇室。^{〔六〕}』

〔一〕呂希哲，宋公著子，字原明，少從胡瑗學，又從

二程、張載游。

〔二〕「鄭衛之音」，謂鄭衛不正之音樂也。

〔三〕曾子，名參，字子輿，其學以忠恕爲主。

〔四〕內，謂本然之善心也。

〔五〕異行，謂不合乎正道之行爲。

〔六〕闇，不明也。「不欺闇室」，謂雖在獨居之地，

亦事事循蹈規矩也。

王元景不苟悅人〔北齊書〕

王昕字元景。太尉汝南王悅辟
騎兵參軍。悅與府寮飲酒，起自移牀。
〔三〕人爭進手，昕獨執版卻立。悅作色
曰：『我帝孫帝子，帝弟帝叔，今爲宴
親起輿牀。卿是何人，獨爲偃蹇？』
對曰：『元景位望微劣，不足使殿下
式瞻儀型，安敢以親王寮案，〔四〕從廝
養〔五〕之役？』悅謝焉。

〔一〕北齊書，唐李百藥撰。

〔二〕牀非臥具，是坐具。移床，謂搬移坐具，以就府僚也。

〔三〕偃蹇，傲不爲禮也。

〔四〕案，讀采，同官也。

〔五〕廝養，僕人也。

傅燮不阿權貴後漢書

中常侍趙忠〔一〕爲車騎將軍論討黃巾〔二〕之功。甄舉〔三〕謂忠曰：『傅南容〔四〕前在東軍，有功不侯。〔五〕天下失望，今將軍宜進賢理屈，以副衆心。』忠納其言，遣弟延致殷勤。〔六〕延謂燮曰：『南容少答〔七〕我常侍，萬戶侯不足得〔八〕也。』燮正色拒之，曰：『遇不遇，命也；有功不論，時也；傅燮豈求私賞哉？』

〔一〕趙忠，東漢靈帝時人。

〔二〕黃巾，東漢末時之亂黨。鉅鹿張角，見漢室日衰，起而爲亂，皆著黃巾，時人謂之黃巾賊。

〔三〕甄舉，東漢靈帝時人。

〔四〕傅南容，名燮，北地靈州人。本字幼起，慕南容之復白圭，遂改字南容。

〔五〕燮破張角，功多當封；忠譖之，竟不封。

〔六〕致殷勤，謂以好意告南容。

〔七〕少答，謂少遷就。

〔八〕不足得，謂得之不難也。

閔仲叔不受施予

後漢書

太原閔仲叔^{〔一〕}者，世稱節士。其同郡周黨^{〔二〕}見仲叔食無菜，遺之生蒜，仲叔反^{〔三〕}而不食。建武^{〔四〕}中，以博士徵^{〔五〕}，不至。客居安邑^{〔六〕}，老病家貧，不能得肉，日買豬肝一片，屠者或不肯與。安邑令聞之，敕吏常給焉。仲叔怪而問之，知乃歎曰：『閔仲叔豈以口腹累安邑耶？』遂去。

〔一〕閔仲叔，漢人，名貢，世稱節士。

〔二〕周黨，字伯況，漢太原光武人。東身修志，州里

稱高。

〔三〕反，還也。

〔四〕建武，後漢光武年號。

〔五〕徵，召也。

〔六〕安邑，漢縣名，即今山西夏縣安邑縣之地。

魯仲連不慕富貴史記

平原君〔一〕欲封魯仲連，連辭不肯受，乃置酒，以千金爲連壽。連笑曰：『所貴於天下之士者，爲人排患釋難解紛亂而無取也；卽有取者，是商賈之事也，連不忍爲也。』遂辭去，終身不復見。其後田單〔二〕言於齊王，欲爵之，〔三〕連逃之海上，曰：『吾與富貴而詘於人，寧貧賤而輕世肆志焉。』

〔一〕平原君，戰國趙武靈王之子，名勝，封於平原，故稱平原君。平原，郡名，戰國趙邑，今山東舊

武定濟南府之西。

〔二〕田單，戰國時齊人。

〔三〕「欲爵之」，謂想封以官爵。

魯男子不納嫠婦家語〔一〕

魯人有獨處室者，鄰之嫠婦〔三〕亦獨處一室。夜暴風雨，嫠婦室壞，趨而託〔三〕焉。魯人閉戶不納。婦自牖與之言：『子何不仁而不納我乎？』魯人曰：『吾聞男女不六十不同居；今子幼，吾亦幼，是以不納。』婦曰：『子何不如柳下惠？』魯人曰：『柳下惠則可，吾固不可；吾將以吾之不可，學柳下惠之可。』

〔一〕家語，爲孔子家語的簡稱，魏王肅注，書名雖見漢志，而書則久佚，今本家語，爲王肅依托之作。

〔二〕嫠，力一音離，嫠婦，寡婦也。

〔三〕託，寄居也。

〔四〕柳下惠，春秋魯大夫，居柳下，諡惠。

原憲不恥困窮韓詩外傳〔二〕

原憲〔三〕居魯，環堵之室，〔三〕蓬戶
甕牖，〔四〕匡坐〔五〕而絃歌。子貢〔六〕乘肥
馬，衣輕裘，往見之。憲楮冠藜杖〔七〕而
應門，正冠則纓絕，振襟則肘見，納履
則踵決。〔八〕子貢曰：『嘻！先生何病也？』
『憲曰：『憲聞之，無財之謂貧；學而
不能行之謂病。憲貧也，非病也。若夫
仁義之匿，而車馬之飾，衣裘之麗，憲
不忍爲也。』』

〔一〕韓詩外傳，漢燕人韓嬰撰。

〔二〕原憲，春秋魯人，字思，孔子弟子。

〔三〕「環堵之室」，小室也。

〔四〕「蓬戶甕牖」，謂用蓬編戶，以甕作窗。

〔五〕匡坐，端坐也。

〔六〕子貢，衛人，姓端木，名賜，孔子弟子。

〔七〕「楮冠藜杖」，卽楮皮所製的帽，藜枝所爲的杖。

〔八〕「正冠則纓絕」，謂冠系腐敗不堪；「振襟則肘見」，謂衣破露臂；「納履則踵決」，謂鞋破露足跟。

〔九〕「仁義之匿」，爲「匿仁義」的倒裝句。下二句同。